

SOALAN NO: 116

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : DATUK KOH NAI KWONG [ALOR GAJAH]
TARIKH : 24 MEI 2016
SOALAN : 115

Datuk Koh Nai Kwong [Alor Gajah] minta **MENTERI KESIHATAN** menyatakan apakah langkah penguatkuasaan untuk mempertingkatkan tahap kebersihan gerai dan kedai makan minum terutama gerai atau kedai yang dikendalikan oleh pekerja asing tanpa pemantauan pemilik lesen perniagaan.

Tuan Yang Di Pertua,

Bagi mempertingkatkan tahap kebersihan premis makanan termasuk gerai dan kedai makanan, Kementerian Kesihatan telah menguatkuaskan perundangan seperti berikut terhadap pemilik premis makanan yang tidak bersih iaitu:

- 1) Penutupan premis tidak melebihi tempoh 14 hari di bawah Seksyen 11, Akta Makanan 1983 di mana mereka yang engkar kepada arahan ini boleh didakwa di mahkamah dan jika sabit

kesalahan, boleh dikenakan penjara selama tempoh tidak lebih daripada lima (5) tahun atau denda atau kedua-duanya; dan

- 2) Kompaun di bawah Peraturan-Peraturan Kebersihan Makanan 2009. Di bawah peraturan ini, terdapat 33 kesalahan yang boleh dikompaun yang meliputi aspek kebersihan am dan kebersihan khusus premis makanan, kebersihan pengendali makanan dan pengendalian makanan.

Tuan Yang Di Pertua,

Berdasarkan peruntukan undang-undang tersebut, Kementerian Kesihatan sentiasa menjalankan pemeriksaan secara rutin ke atas premis makanan di seluruh negara di samping menjalankan Operasi Premis Makanan Bersih berjadual dengan kekerapan dua (2) kali sebulan. Pada tahun 2015, sebanyak 124,254 premis makanan telah diperiksa dan 2,422 (1.9%) daripadanya telah ditutup manakala daripada bulan Januari hingga Mac tahun ini sebanyak 645 (2.3%) premis makanan telah ditutup daripada 28,026 premis makanan yang telah diperiksa.

Sehubungan dengan itu, sebanyak 8,201 notis di bawah Seksyen 32B, Akta Makanan 1983 telah dikeluarkan pada tahun 2015 terhadap pengendali makanan atau pengusaha premis makanan yang tidak mematuhi mana-mana keperluan Peraturan-Peraturan Kebersihan Makanan 2009. Sementara itu dari bulan Januari hingga Mac tahun ini, sebanyak 3,418 notis tersebut telah dikeluarkan.

Sementara itu bagi pemantauan sehingga Mac 2016 terhadap pekerja asing di premis makanan, seramai 7,051 orang pengendali makanan yang terdiri daripada pekerja asing telah diperiksa semasa pemeriksaan premis makanan dijalankan. Daripada jumlah pekerja asing yang diperiksa ini, didapati seramai 1,820 orang tidak mendapatkan suntikan anti-tifoid dan 2,320 orang tidak menghadiri latihan pengendali makanan seperti yang telah diperuntukkan di bawah Peraturan-Peraturan Kebersihan Makanan 2009.

Tuan Yang Di Pertua,

Dengan peningkatan aktiviti penguatkuasaan oleh Kementerian Kesihatan dari semasa ke semasa, adalah diharapkan tahap kebersihan premis makanan di seluruh negara akan turut meningkat.